

## Evening Dogri News Bulletin,

12 September 2024 18:15 Hrs

### Headlines

- रक्षा मंत्री राजनाथ सिंह होरें आखेआ ऐ जे देश आत्मनिर्भर भारत दे नमें संकल्प कन्नै रक्षा क्षेत्र च तेजिया कन्नै अग्गे बधा'रदा ऐ।
- केंद्री खजाना मंत्री निर्मला सीतारमण होरें आखेआ ऐ जे सरकार महिलाएं गी आत्म निर्भर बनाने दा धैय्या रखदी ऐ।
- विज्ञान-तकनीकी राज्य मंत्री डॉ. जतिंद्र सिंह होरें अज्ज आखेआ जे भारत च जैव तकनीक पर आधारित जैविक क्रांति आला रोमांचकारी समां औने आहला ऐ।
- अमरीका नै भारत गी 5 करोड़ 28 लक्ख डालर दी कीमत दी हाई अल्टीट्यूड पनडुब्बी रोधी प्रणाली 'सोनोबॉय' भारत गी बेचने दा निश्चय कीता ऐ।

<><><><><><>

### Jaipur-Rajnath

रक्षा मंत्री राजनाथ सिंह होरें बधा'रदिएं वैश्विक चुनौतिएं कन्नै निब्बड़ने लेई दोस्त मुलखें गी अपनी सांझ भ्याली बधाइयै नमें आयाम तकर पजाने दा आह्वान कीता। रक्षा मंत्री होरें अज्ज जोधपुर, राजस्थान च हवाई सेना दे हुनै तकर दे सब्भनें शा बड्डे बहुराष्ट्रीय सैनिक अभ्यास, "तरंग शक्ति" दे मौके बोलदे होई इयां आखेआ। उनें आखेआ, "तरंग शक्ति" मित्तर मुलखें बश्कार सहयोग ते आपसी विश्वास बधाने दा जरिया ऐ। रक्षा मंत्री होरें देसै दी बधदी सैनिक समर्थ दा जिक्र करदे होई आखेआ जे पैहले भारत रक्षा उपकरणें दा आयात करदा हा पर हून 90 मुलखें गी रक्षा उत्पादें दा निर्यात करदा ऐ। उनें आखेआ जे देश अपनिएं जरूरतं मुजब रक्षा उपकरणें गी तैयार करा'रदा ऐ ते दोस्त मुलखें कन्नै अति आधुनिक प्रौद्योगिकी दे उत्पाद बनाने दे सहयोग च बी शामिल ऐ।



## Nirmla-Sitharaman

केंद्री खजना मंत्री निर्मला सीतारमण होंरें आखेआ ऐ जे सरकार महिलाएं गी अत्मनिर्भर बनाने दे निश्चै पर खडुत्त ऐ तां जे महिलां इज्जत-मानै आले तरीके राहें अपनी रोजी रूट्टी कमाई सकन ते सशक्त बनियै उपलब्धियां हासल करी सकन। अज्ज Coimbatore च इक कल्याण स्कीम दे इक हिस्से दे तौर महिलाएं गी टल्ले सीने आहिलयां मशीनां बंडुने मगरा बोलदे होई उनें आखेआ जे Coimbatore दिएं 2 लक्ख महिलां प्रधानमंत्री जीवन ज्योति योजना स्कीम कन्नै जुडियां ना। खजाना मंत्री होंरें आखेआ जे 60 प्रतिशत महिलाएं अपने बैंक खाते खोली लेदे ना। जन धन योजना, जीवन सुरक्षा अटल पेंशन योजना, मुद्रा ते स्टार्ट अप स्कीमें बारै मंत्री होंरें दस्सेया जे केंद्र सरकार समाज दे सब्बनें वर्गे दे लोकें दी भलाई बेहतरी लेई तनदेही कन्नै कम्म करा'रदी ऐ। खजाना मंत्री होंरें देशे दे विकास ते खास करियै समाज दिएं महिलाएं ते नौजवानें लेई सरकार आस्सेया भक्खि गी ध्यानै च रक्खियै शुरू कीते गेदे राँ-रवैये बारै दस्सेया।



## CS-Health

मुख्व सचिव अटल डुल्लू होंरें राष्ट्रीय सेहत मिशन तैहत हासिल प्रगति दा जायजा लैता। बैठक दौरान मुख्व सचिव होंरें बुनियादी सेहत केंद्रें गी होर बेहतर करने पर जोर पाया। टेली सेवाएं बारै बोलदे होई उनें आखेआ जे इस बारै लोकें च होर मती जागरूकता फैलाने दी लोड ऐ। मुख्व सचिव होंरें डीएनबी सीट बारै बी गल्ल कीती ते आखेआ जे इंदा पूरा इस्तेमाल होना लोडचदा ते कोई बी सीट खाली नेई रौहनी लोडचदी। उनें आभा आई.डी कायम करने आली भेठा होई दी प्रगति बारै बी गल्ल कीती।



## Rajiv-Monsoon

मच्छी पालन, पशु पालन ते डेयरी मैहकमे दे मंत्री राजीव रंजन सिंह कल भुवनेश्वर उड़ीसा च पशु पालन ते डेयरी सेक्टर बारै मानसून बैठक लांगन। मंत्री होंरें दस्सेया मानसून बैठक दा मकसद राजयें ते संघ शासित प्रदेशें

दिएं आसें-तांगें गी केंद्र च रक्खियै उंदे लेई योजना तैयार कीतियां जांगन जेदे नै जमीनी सतह पर इस प्रोग्राम दी असरदार अमलावरी कीती जाई सकै।

<><><><><><>

### Ammunition-Recovered

सुरक्षा बलें उत्तरी कश्मीर दे कुपवाड़ा जिलें थमां कल हथियार असले ते धामाकाखेज समेयान दी इक बड्डी खेप बरामद कीती ऐ। टकोह्दी खुफिया सूह दे आधार पर सेना ते जम्मू-कश्मीर पोलीस नै कुपवाड़ा दे केरन सेक्टर च इक सांझा तपाशी अभियान चलाया ते दस्सी गेदी थाहरै थमां हथियार असलाहू, धमाकेखेज सामग्री ते ए.के-47 रफलै दे राउंद बरामद कीते। एहदे अलावा हत्थ गोले आर.पी.जी राउंद, आई.ई.डी ते जंग लेई इस्तेमाल च औने आहली भंडार सामग्री बी बरामद कीती गेई। श्रीनगर दे रक्षा पीआरओ मुजब संघ शासित जम्मू-कश्मीर दी हालिया सुरक्षा स्थिति ते भविक्ख च होने आहले महत्वै आहले आयोजनें गी ध्यानै च रखदे होई हथियार असले दी एहू बरामदगी बड़ा महत्व रखदी ऐ। सुरक्षा बलें प्रांतै च स्थिरता ते अमन-शांति आला माहौल कायम करने दी म्हेशां गै पक्क ध्यायी दी होंदी ऐ।

<><><><><><>

### Ayush

आयुष मंत्रालय नै विशेष मुहिम 3.0 तैहत 1 ज्हार 300 जन शकैतें दा नपटारा कीता ऐ। मंत्रालय नै दस्सेया जे इस मुहिम दा मकसद कम्मै-काजै आहलिएं थाहरें पर सफाई-सुथराई च सुधार करना ते उसी कायम करना ऐ। एहदे कन्नै गै सांसदे दिएं बकाया पेदिएं 33एं प्रतिक्रियाएं दे संदर्भ च 18एं संसदीय आश्वासनें ते 187एं सार्वजनिक शकैतें आलिएं अपीलें दा बी नपटारा कीता गेआ। हून मंत्रालय 4.0 आली विशेष मुहिम लेई तैयार ऐ।

<><><><><><>

### Global Bio India

साईसद ते टेक्नोलॉजी दे राज्यमंत्री डॉ. जितेंद्र सिंह होरें आखेआ जे भारत जैव प्रौद्योगिकी आधारित जैविक क्रांति दे युग आली भेठा अगगै बदा'रदा ऐ। अज्ज नमीं दिल्ली च भारत मंडपम च वैश्विक जैविक भारत 2024

गी संबोधित करा रदे हे। उनें आखेआ जे जिस चाल्ली इक समें च पच्छमी मुल्लें च सूचना प्रौद्योगिकी क्रांति दा असर हा उसै चाल्ली अज्ज भारत गी बी जैविक क्रांति सोयां लंगघना पवा'रदा ऐ। वैश्विक जैविक भारत 2024 बारै च विचार सांझा करदे होई डॉ. सिंह होरें आखेआ जे बक्ख-बक्ख मंत्रालयें, राज्य सरकारें, नमें कम्मकाज शुरू करने आहली संस्थाएं, शोधकर्ताएं, अंतरराष्ट्रीय संस्थाएं, नीति बनाने आहलें आस्तै एह मंच इक भूमिका निभाग। वैश्विक जैविक भारत-2024 दे मौके पर 30 थ्वां मते मुल्लें अपनियां प्रदर्शनियां लाइयां ना।

<><><><><><>

## US-India Submarine

अमरीका नै भारत गी 5 करोड़ 28 लक्ख डॉलर दी कीमत दी हाई ऑल्टीट्यूड पनडुब्बी रोधी प्रणाली सोनोबॉय बेचने दा निर्णय लैता ऐ। एहदे नै भारत दी MH-60 R हेलीकॉप्टर जरिये पनडुब्बी रोधी अभियान चलाने दी समर्थ च बाद्दा हाग ते भारत अमरीका रणनीतिक ते रखा सरबंध बी मजबूत होडन। अमरीका दे रक्षा विभाग नै अमरीकी कांग्रेस गी इस सौदे दे बारे च जानकारी दिती ऐ पर इसी अजें अमरीकी कांग्रेस थमां मंजूरी नेई थ्होई ऐ। अमरीकी कांग्रेस दी इक अधिसूचना मुजब भारत नै एह पनडुब्बी खरीदने दी मंशा जाहिर कीती ही। सोनोबॉयज़ पनडुब्बी च हवाऊ थमां कम्म शुरू करने दी समर्थ ऐ। एहदे च इलेक्ट्रो मकेनिकल सेंसर लग्गे दे न जेदे राहें एह पानियै दे अंदरा आवा'रदिएं अवाजें गी रिमोट प्रोसेसरें तकर प्रसारित करी सकदी ऐ। एह पनडुब्बी बड़ी असरदार ऐ ते एह किफायती बी ऐ।

<><><><><><>

## LG

कांग्रेस सांसद राहुल गांधी हुंदे आस्सेया राजा आखने आहली टिप्पणी पर उपराज्यपाल मनोज सिन्हा होरें आखेआ ऐ जे ओह इस्तीफा देई देंगन जे 75 फीसद लोक इयां आक्खुडान या इसदा समर्थन करना। उनें आखेआ जे पिछले 5 बरें दौरान लोकें दी भलाई बेहतरी लेई कम्म कीता गेआ ऐ। इक निजी चैनल पर बोलदे होई सिन्हा होरें आखेआ जे दफा 370 गी हटाए जाने बारे लोकें दे विचार ते उंदी प्रक्रिया जानने आस्तै गुप्त मतदान करोआया

जाना लोडचदा। उयां उनें आखेआ जे जेडी बी पार्टी जम्मू-कश्मीर च अगली सरकार बनाग, उसी उंदा पूरा समर्थन हासिल होग। सिन्हा होरें आखेआ जे विधानसभा चुनां त्रऊं चरणें च 18 सितंबर थ्वां शुरू होआ रदे न। चुनां प्रचार जोरें-शोरें कन्नै जारी ऐ। लोकसभा च होए दे रिकार्ड मतदान बारै बोलदे होई एलजी होरें आखेआ जे एहू इस करिए होआ की जे लोक पाकिस्तान दी साजिश गी समझी चुके दे न। जम्मू-कश्मीर च 58 अशारिया 4-6 फीसद मतदान होआ हा जेडा पिछले 35 बरें च सब्बनें थ्वां मता हा। जम्मू-कश्मीर दे लोकें खास करी घाटी दे लोकें लोकतंत्र च अपना पूरा भरोसा जाहिर कीता।

<><><><><><>

### SVEEP-SPRMC

जिला जम्मू दी स्वीप टीम नै SPMR College of Commerce दे सहयोग कन्नै इक्क सांस्कृतिक कार्यक्रम दा सरिस्ता कीता जेदा मकसद युवा मतदाताएं गी वोट पाने दे अपने अधिकार बारै जानकार बनाना हा ते औंदे विधानसभा चुनाएं च उंदी शमूलियत गी यकीनी करना ऐ। इस दौरान विद्यार्थिं बक्ख-बक्ख गतिविधिं जियां नाटक, नृत्य ते गीत गाने आले कार्यक्रमें च बदी-चढिए हिस्सा लैता। इस मौके पर बोलदे होई जिला जम्मू च स्वीप दे नोडल अफसर डॉ. विकास शर्मा होरें विद्यार्थिं गी वोट पाने दे महत्व बारै जागरूक कीता। योग्य मतदाताएं गी आखेआ गेआ जे ओहू पैहली अक्तूबर गी वोट पाने दे अपने अधिकार दा पक्क गै इस्तेमाल करन। कॉलेज दे प्रिंसीपल प्रो. राजेंद्र सिंह होरें स्वीप टीम गी अपने अनमुल्ले विचार ते महत्वपूर्ण जानकारी सांझा करने लेई धन्नवाद कीता।

<><><><><><>

### Thakur-Nomination

भारतीय जनता पार्टी दे सांसद अनुराग सिंह ठाकुर होरें विश्वास जाहिर कीता ऐ जे भारतीय जनता पार्टी जम्मू-कश्मीर च पैहली बारी पूर्ण बहुमत कन्नै सरकार कायम करोग। एहू गल्ल उनें भारतीय जनता पार्टी दे मेदवार देवेन्द्र सिंह राणा हुंदे समर्थन च नगरोटा च इक रैली गी संबोधित करदे होई आक्खी। रैली दा सरिस्ता राणा हुंदे आस्सेया नामांकन भरने मगरा कीता गेआ। ठाकुर हुंदे अलावा बीजेपी दे राश्ट्रीय महासचिव राम माधव ते होर

दुए वरिष्ठ नेता बी नामांकन भरने दौरान राणा हुंदा कन्नै मौजूद हे। ठाकुर होरें लोकें दे उत्साह दा बी जिक्र कीता।  
उनें आखेआ जे लोकें दा समर्थन बीजेपी दे हक्क च ऐ।

<><><><><><>

### Bike Rally Poonch

स्वीप तैहत पुंछ च जिला चुनां प्रशासन आस्सेया इक बाइक रैली दा सरिस्ता कीता गेआ। एहदा मकसद मतदाताएं दी चुनां प्रक्रिया च शमूलियत गी बदाना ऐ। एह रैली पुंछ दे डाक बंगले थवां शुरू होई ते बक्ख-बक्ख इलाकें थवां हुंदी होई लंग्धी। रैली गी एडीसी होरें झंडी दस्सिए रवाना कीता गेआ। कार्यक्रम दी अगुवाई जिला चुनां अफसर विकास कुंडल होरें कीती। एहदे च चुनां निगरानें ते होरनें अफसरें हिस्सा लेता। इस मौके पर बोलदे होई जिला चुनां अधिकारी पुंछ विकास कुंडल होरें वोट पाने दे महत्व गी उजागर कीता। उनें आखेआ जे इस रैली दा सरिस्ता लोकें गी चुनां बारै होर मता जानकार ते जागरूक बनाने लेई कीता गेआ ऐ। औदे विधानसभा चुनाएं च हर योग्य मतदाता दी शमूलियत लाजमी ऐ ते एह रैली उसै आस्ते ऐ। इस रैली दौरान लोकें गी वोट पाने दे महत्व, वोट पाने दे अधिकार ते लोकतांत्रिक प्रक्रिया बारै जानकार बनाया गेआ।

<><><><><><>

### Election-Training Rajouri

राजौरी जिले दे 5 विधानसभा हल्के दे सैक्टर ते ज़ोनल मैजिस्ट्रेट आस्ते चुनां सरबंधी सिखलाई सत्र सफलतापूर्वक सम्पन्न होई गेआ। इस दौरान मुख करी ध्यान औदे विधानसभा चुनाएं पर दिता गेआ। एह सिखलाई कार्यक्रम जिले दे 5 विधानसभा हल्के लेई कालाकोट दे सरकारी डिग्री कॉलेज च आयोजित होआ। जिला सतह दे मास्ट ट्रेनरें ते विधानसभा सतह दे मास्टर ट्रेनर्स आस्सेया सिखलाई दिती गेई। इस मौके पर बोलदे होई सिखलाई सरबंधी जिला सतह दे नोडल अफसर डॉ. नसीम मलिक होरें आखेआ जे इस सिखलाई दा मकसद सारें सरबंधी कर्मचारिएं गी महत्वपूर्ण जानकारी ते लोडचदा हुनर उपलब्ध करोआना हा तां जे एह पूरी प्रक्रिया रमानदारी आले ढंगे सिर सम्पन्न होई सकै।

<><><><><><>

### PM-Paralympics

प्रधानमंत्री नरेंद्र मोदी होरें पैरा ओलंपिक्स च हिस्सा लैने आले भारतीय दल कन्नै अज्ज गल्लबात कीती। मोदी होरें इस खेड्डु आयोजन च हिस्सा लैने ते खडारिएं दे प्रदर्शन आस्तै पदक जित्तने आले ते होरनें दुएं गी मुबारकबाद दिती। भारत नै पैरालंपिक च 7 सुन्ने दे, 9 चांदी दे ते 13 कैहू दे तगमे सने कुल 29 तगमें जित्तिए अजें तगर दा सब्बनें थ्वां बेहतर प्रदर्शन कीता ऐ। खेड्डु मंत्री मनसुख मांडविया ते भारतीय पैरालंपिक समिति दे अध्यक्ष देवेन्द्र झाझरिया होर बी मौजूद हे। उनें बी इनें खडारिएं कन्नै गल्लबात कीती।

<><><><><><>